



Visius magnæ fortitudinis heros ex Gothica gente prognatus sub Vitige rege in magna autoritate extitit. Nam in prælijs primum semper locum occupabat, atque sua manu multos hostium conficiebat. Accidit autem quandoque cum Bellisarius & Vitiges circa Romam urbem decertarent, atque prælium oriente sole inceptum ad multam noctem continuaretur, quod Visius primas in acie partes agens, haud prius strenuè pugnare desisteret, quàm tredecim uulneribus suo corpore exceptis, ueluti moribundus collaberetur. Vnde cum reliqui putarent eum interis̄se, à socijs uictoribus inter occisorum cadauera relictus fuit.

Verum post tertium diem cum Gothi castra circa urbis muros collocassent, atque quosdam misissent qui suos sepelirent, Visius adhuc spirans inter mortuos deprehensus fuit. Itaq; quidam ex socijs eum compellauit, atque ex uultu æstuantem eius sitim intellexit. Tum illico aqua refectum in castra magno gaudio retulerunt. Is postea diu superuixit, atq; apud Gothos sibi magnam famam & gloriam comparauit. Ioan. Mag. libro II. capite 9.